

223872

歐陽文忠集

中華書局印行



歐陽文忠全集

17855

四部備要

集部

上海中華書局據祠堂本

校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

版權所有不許翻印

乾隆二十四年敘奉

御製歐陽修小像詩并序

侍郎某曰修典試江南道滁州見醉翁亭故蹟彼有藏歐陽修小像者攜以來舉沈德潛爲乞文徵明題辭故事尤其請書以還之

是誰三疊儼圖諸太守風流憶治滁題詠名高宋人物幅間有李端叔晁悅之所題贊操絃韻軼古樵漁謂蘇軾醉翁提翁之樂者山林也像亦何妨水月如使節新從驪泉過依然鄉井下風餘

聖韻

曠世遭逢信有諸當年遷謫始來滁溪山託興傳遺像  
雲漢流光照夜漁八代起衰良可繼千秋定論更誰如  
轅軒到處憑搜訪風雅都沾

睿藻餘

歐陽修嗣孫臣安世恭和

聖韻

我祖遭逢洵美諸爭傳使節道於滁廬陵今日昭  
雲漢賴水當年想佃漁  
天語燭人光燦燦神容遺世竊如如豈惟舊守承  
恩寵奕葉孫枝拜慶餘

居士集序

門人翰林學士承旨左朝奉郎知制誥兼侍讀蘇軾撰

夫言有大而非夸達者信之衆人疑焉孔子曰天之將喪斯文也後死者不得與於斯文也孟子曰禹抑洪水孔子作春秋而子距楊墨蓋以是配禹也文章之得喪何與於天而禹之功與天地並孔子孟子以空言配之不已夸乎自春秋作而亂臣賊子懼孟子之言行而楊墨之道廢天下以爲是二字一作是爲固然而不知其功孟子既沒有申商韓非之學遠道而趣利殘民以厚主其說至陋也而士以是罔其上上之人僥倖一切之功靡然從之而世無大人先生如孔子孟子者推其本末權其禍福之輕重以救其惑故其學遂行秦以是喪天下陵夷至於勝廣劉項之禍死者十八九天下蕭然洪水之患蓋不至此也方秦之未得志也使復有一孟子則申韓爲空言作於其心害於其事作於其政者必不至若是烈也使楊墨得志於天下其禍豈減於申韓哉由此言之雖以孟子配禹可也太史公曰蓋公言黃老賈誼晁錯明申韓錯不足道也而誼亦爲之予以是知邪說之移人雖豪傑之士有不能免者况衆人乎自漢以來道術不出於孔氏而亂天下者多矣晉以老莊亡梁以佛亡莫或正之五百餘年而後得韓愈學者以愈配孟子蓋庶幾焉愈之後三百有餘年而後得歐陽子其學推韓愈孟子以達於孔子著禮樂仁義之實以合於大道其言簡而明信而通引物連類折之於至理以服人心故天下翕然師尊之自歐陽子之存世之不說者諱而攻之能折困其身而不能屈其言士無賢不肖不謀而同曰歐陽子今之韓愈也宋興七十餘年民不知兵富而教之至天聖景祐極矣而斯文終有愧於古士亦因陋守舊論卑而氣弱自歐陽子出天下爭自濯磨以通經學古爲高以救時行道爲賢以犯顏納說爲忠長育成就至嘉祐末號稱多士歐陽子之功爲多嗚呼此豈人力也哉非天其孰

能使之歐陽子沒十有餘年士始爲新學以佛老之似亂周孔之實識者憂之賴天子明聖詔修取士法風厲學者專治孔氏黜異端然後風俗一變考論師友淵源所自復知誦習歐陽子之書予得其詩文七百六十六篇於其子棐乃次而論之曰歐陽子論大道似韓愈論事似陸贄記事似司馬遷詩賦似李白此非予言也天下之言也歐陽子諱修字永叔既老自謂六一居士云元祐六年六月十五日敘諸本作三年十二月是時任翰林學士

四朝國史本傳評點問疑

歐陽修字永叔吉州廬陵人四歲而孤母鄭氏親誨之學及冠巍然有聲宋興且百年而文章體裁猶仍五季餘習鏗刻駢偶渙然弗振士因陋守舊論卑氣弱蘇舜元舜欽柳開穆修輩咸有意作而張之而力不足韓愈遺藁闕於世學者不復道修游隨得於廢書簾中讀而心慕焉晝停食夜忘寐苦志探賸必欲并轡絕馳而追與之並舉進士試南宮第一擢甲科調西京推官留守錢惟演器其材不擇以吏事修以政欲得盡力於學入朝爲館閣校勘范仲淹以言時事貶在廷多論救司諫高若訥獨以爲當黜修詒書責之謂不知世間有差取事若訥上其書坐貶夷陵令稍徙乾德令武成節度判官仲淹使陝西辟掌書記修笑而辭曰昔者之舉豈以爲利哉同其退不同其進可也久之復校勘進集賢校理慶曆二年知諫院時仁宗更用大臣杜衍富弼韓琦仲淹皆在位增諫官員修首在選中每進見勸帝延問執政咨所宜行既多所張弛小人翕翕不便修慮善人必不勝數爲帝分別言之又上朋黨論其略以謂小人無朋惟君子則有之小人所好者利祿所貪者財貨當同利之時暫相黨引及見利而爭先則反相賊害雖兄弟親戚不能相保故曰小人無朋君子則不然所守者道義所行者忠信所惜者名節以之修身則同道而相益以之事國則同心而共濟終始如一故曰君子有朋紂有臣億萬惟億萬心可謂無朋矣而紂用以亡武王有臣三千惟一心可謂大朋矣而周用以興蓋君子之朋雖多而不厭故也修天性疾惡論事無所回隱人視之如仇而愈奮勵不顧帝獨獎其敢言面賜五品服顧侍臣曰如歐陽修者何處得來同修起居注遂知制誥故事必試而後命詔特除之奉使河東自西方用兵議者欲廢麟州以省餽餉修曰麟州天險不可廢廢之則河內郡縣民皆不安居矣不若分其兵駐並河諸堡緩急得以應援而平時可省轉輸於策爲便由是州得

存又言忻代苛虐多禁地廢田願令民得耕之不然將爲虜有朝廷下其議久乃行歲得粟數百萬斛使還會保州兵亂以爲龍圖閣直學士河北都轉運使陟辭帝曰勿爲久留計有所欲言言之對曰臣在諫職得論事今越職而言罪也帝曰但言之毋以中外爲間賊平大將李昭亮通判馮博文私納婦女修捕博文繫獄昭亮懼立出之兵之始亂也招以不死既而皆殺之脅從二千人分隸諸郡富弼爲宣撫使恐後生變將使同日誅之與修遇於內黃夜半屏人告之故修曰禍莫大於殺已降況脅從乎既非朝命脫一郡不從爲變不細弼悟而止杜衍等相繼罷去修上疏曰此四人者天下皆知其有用之賢而不聞其有可罷之罪小人欲廣陷良善必指爲朋黨欲動搖大臣必誣以顯權蓋善人少過唯指以爲黨則可一時盡逐今四人一旦罷去臣爲朝廷惜之於是邪黨益忌修因其孤甥張氏獄傳致以罪左遷知制誥知滁州居二年徙揚州頴州復學士召判流內銓時在外十一年矣帝見其髮白問勞甚至又有詐爲修奏乞內侍爲姦利者其羣皆怨怒修之出知同州帝納吳充言而止遷翰林學士於是富弼韓琦復用慶曆故臣稍集士大夫知天子有致治之意相賀於朝修乞蔡州去帝復納劉敞趙抃之言而止奉使契丹其主命貴臣四人押燕曰此非常制以卿名重故爾知嘉祐二年貢舉時士子尙爲險怪奇澀之文號太學體修痛排抑之凡如是者輒黜舉事向之黨漸者同修出聚議於馬首街邇不能制然揚屋之習從是遂變加龍圖閣學士知開封府承包拯威嚴之後簡易循理不求赫赫名京師亦治旬月改羣牧使在翰林八年知無不言河決商胡北京留守賈昌朝欲開橫隴故道回河使東有李仲昌者欲導入六塔河議者莫知所從修以爲河水重濁理無不淤下流既淤上流必決以近事驗之決河非不能力塞故道非不能力復但勢不能久耳橫隴功大難成雖成將復決六塔狹小而以全河注之濱隸德博必

被其害不若因水所趨增堤疏其下流縱使入海此數十年之利也宰相陳執中主昌朝文彥博主仲昌竟爲河北患狄青爲樞密使有威名帝不豫詔言籍籍修請出之於外以保其終嘉祐元年水災修上疏曰陛下臨御三紀而儲宮未建昔漢文帝初即位以羣臣之言即立太子而享國長久爲漢太宗唐明宗惡人言儲嗣事不肯早定致秦王之亂宗社遂覆陛下何疑而久不定乎其後建立英宗蓋原於此五年拜樞密副使六年參知政事英宗未親政皇太后御簾大臣奏事間有未可修必力抗是非臺諫官至政事堂所論或矯異他執政未及言已面折其短朝士建白利害及凡所求請必明告之曰某事可行某事不可行以是怨誹益衆帝將追崇濮王命有司訂議皆謂當稱皇伯改封大國修引喪服記以爲爲人後者爲其父母服降三年爲期而不沒其父母之名以見服可降而名不可沒也若本生之親改稱皇伯歷考前世皆無典據進封大國則又禮無加爵之道故中書之議不與衆同太后出手書許帝稱親尊王爲皇王夫人爲后帝不敢當於是御史呂誨等六人爭論不已指修爲主議皆被逐惟蔣之奇之說合修意修薦爲御史衆目爲姦邪之奇患之則思所以自解修婦弟薛宗儒有憾於修造帷薄不根之謗推辱之展轉達於中丞彭思永思永以告之奇之奇即上章劾修神宗初即位欲深譴修訪於故宮臣孫思恭思恭爲辨釋修杜門請推治帝使詰思永之奇問所從來辭窮皆坐黜修亦罷爲觀文殿學士知亳州明年移青州改宣徽南院使判太原府辭不拜徙蔡州修本以風節自持既數因汙穢纔年六十即連乞謝事帝輒優詔弗許及守青又以擅止散青苗錢爲王安石所詆故求歸愈切熙寧四年以太子少師致仕五年薨年六十六贈太子太師諡曰文忠修始在滁州號醉翁晚更號六一居士天資剛勁見義勇爲雖機穽在前觸發之不顧放逐流離至于再三志氣自若不悔也爲文天材自然豐約中度其

學推韓愈孟軻以達於孔氏著禮樂仁義之實以合於大道其言簡而明信而通引物連類折之於至理以服人心超然獨騁衆莫能及故天下翕然師尊之獎引後進如恐不及賞識之下率爲聞人曾鞏王安石蘇洵洵子軾轍布衣屏處未爲人知修即游其聲譽謂必顯於世薦於朋友生則振掖之死則調護其家好古嗜學凡周漢以降金石遺文斷篇殘簡一切掇拾研精異同立說於左的的可表證謂之集古錄奉詔修唐書紀志表自撰五代史記法嚴詞約多取春秋遺旨殆與史漢相上下蘇軾敬其文曰論大道似韓愈論事似陸贄記事似司馬遷詩賦似李白識者以爲名言中子葉某字叔弼廣覽彊記能文詞年十二時見修著鳴蟬賦侍於側不去修撫之曰兒異時必能爲此因書以遺之用歷爲秘書省正字登進士乙科念父老不肯仕強之乃調陳州判官終不行修所爲文須人代者多出其手修薨代草遺表神宗讀而愛之意修自作也免喪始爲審官主簿官制局檢詳官太常博士主客考功員外郎議者患選人員多請令二十五歲而試於銓又守選三年而後仕進士特奏名者予之官而不使調選某曰是非朝廷所以立議本意也且所爲議冗官者欲利士人耳今加年而使守選是反害之也所謂特奏名者非他儒人老於場屋者也閱其無成而老故予之微官使磨礱而後歸今乃授之虛名是終窮之也遂得不變元祐初以集賢校理爲著作郎判登聞鼓院復徙職方禮部員外郎知襄州會布執政其婦兄魏泰恃聲勢來居襄規占公私田園強市買與民爭利郡縣莫敢誰何至是指州門東偏官邸廢址爲天荒而請之吏具成牘至某曰孰謂州門之東偏而有天荒乎邵之衆共白曰泰橫於漢南久今求地而緩與之且不可而又可邵邪某竟持不與泰怒譖於布徙之滁州旋又罷去奪校理元符末遷朝歷吏部右司二郎中以直秘閣知蔡州蔡地薄賦重轉運使又爲覆折之令多取於民民不堪命會有詔禁止而佐吏憚

使者不敢以詔旨從事。某曰：州郡之於民，詔令苟有未便，猶將建請。今天子德意深厚，知覆折之病民，手詔止之。若有憚而不行，何以爲長吏？命卽日行之。未幾，坐黨籍廢十餘年。卒年六十七。史臣曰：由三代以降，薄乎秦漢，文章雖與時盛衰，而藹如其言，曄如其光，皦如其音。蓋均有先王之遺烈。涉晉魏而弊至，唐韓愈氏乃復起唐之文。涉五季而弊至，修復起閔百川之頽波，導之東注。斯文正傳，追步前古。匹夫而爲百世師，一言而爲天下法。此兩人足以當之，愈不極於用修用矣，而不極其至。然國朝文風彬彬，至今修之功，學士大夫相與尸而祝之可也。



歐陽文忠公集自汴京江浙閩蜀皆有之前輩嘗言公作文揭之壁間朝夕改定今觀手寫秋聲賦凡數本劉原父手帖亦至再三而用字往往不同故別本尤多後世傳錄既廣又或以意輕改殆至訛謬不可讀廬陵所刊抑又甚焉卷帙叢勝略無統紀私竊病之久欲訂正而患寡陋未能也會郡人孫謙益老於儒學刻意斯文承直郎丁朝佐博覽羣書尤長考證於是徧搜舊本傍采先賢文集與鄉貢進士會三異等互加編校起紹熙辛亥春迄慶元丙辰夏成一百五十三卷別爲附錄五卷可繕寫模印惟居士集經公決擇篇目素定而參校衆本有增損其辭至百字者有移易後章爲前章者皆已附注其下如正統論吉州學記瀧岡阡表又迥然不同則收實外集自餘去取因革粗有據依或不必存而存之各爲之說列於卷末以釋後人之惑第首尾浩博隨往隨刻歲月差互標注抵牾所不能免其視舊本則有間矣既以補鄉邦之闕亦使學者據舊鑒新思公所以增損移易則雖與公生不同時殆將如升堂避席親承指授或因是稍悟爲文之法此區區本意也六月己巳前進士周必大謹書

廬陵歐陽文忠公年譜

真宗景德四年丁未

是歲皇考崇國公觀爲綿州軍事推官六月二十一日寅時公生

大中祥符元年戊申

大中祥符二年己酉

大中祥符三年庚戌

是歲崇公終於泰州軍事判官公叔父曄時任隨州推官因卜居

焉公母夫人鄭氏年方二十九攜公往依之遂家于隨貧無資以

獲書地教公書字稍長多誦古人篇章使學爲詩叔父後歷閬州

推官江陵府掌書記仕至二千石終都官員外郎

大中祥符四年辛亥  
是歲華崇公于吉州吉水縣龍岡其後至和元年析吉水縣之縣

恩鎮置永豐縣從隸永豐

大中祥符五年壬子

大中祥符六年癸丑

大中祥符七年甲寅

大中祥符八年乙卯

大中祥符九年丙辰

公年十歲在隨家益貧借書抄誦州南大姓李氏子好學公多遊  
其家於故書中得唐韓昌黎文六卷乞以歸讀而愛之爲詩賦下

筆如成人

都官曰奇童也它日必有重名

天禧元年丁巳

天禧二年戊午

天禧三年己未

天禧四年庚申

天禧五年辛酉

乾興元年壬戌

二月仁宗卽位

仁宗天聖元年癸亥

是歲公應舉隨州試左氏失之誣論其略云石言子晉神降于莘  
內蛇鬪而外蛇傷新鬼大而故鬼小人已傳誦坐賦逸官韻黜

天聖二年甲子

天聖三年乙丑

天聖四年丙寅

公年二十自隨州薦各禮部

天聖五年丁卯

是春試禮部不中

天聖六年戊辰公年二十二

是歲公攜文謁胥學士偃於漢陽胥公大奇之留置門下冬攜公

泛江如京師

天聖七年己巳公年二十三

是春公從胥在京師試國子監爲第一補廣文館生秋赴國學解

試又第一

天聖八年庚午公年二十四

正月試禮部翰林學士晏公殊知貢舉公復爲第一三月御試崇  
政殿公甲科第十四名五月授將仕郎試秘書省校書郎充西京

留守推官

天聖九年辛未公年二十五

三月公至西京錢文僖公惟演爲留守幕府多名士與尹洙師魯  
梅堯臣聖俞尤善日爲古文歌詩遂以文章名冠天下初胥公許

以女妻公是歲親迎于東武

明道元年壬申公年二十六

是春及秋兩遊嵩嶽秋盡從通判謝絳奉御香告廟也禮畢同遊五人皆見峭壁大書神清之洞詳見附錄後謝希深與梅聖俞書公又嘗行縣視旱蝗

明道二年癸酉公年二十七

正月以吏事如京師因省叔父于漢東三月還洛夫人胥氏卒時生子未踰月九月莊獻劉后莊懿李后祔葬定陵公至鞏縣陪祭十二月進階承奉郎

景祐元年甲戌公年二十八

三月西京秩滿歸襄城五月如京師會前留守王文康公曙入樞府薦召試學士院閏六月乙酉授宣德郎試大理評事兼監察御史充鎮南軍節度掌書記館閣校勘三館秘閣所藏書多脫謬七月甲辰詔委官編定御製元四部著爲總目公預焉是歲再娶諫議大夫楊公大雅女

景祐二年乙亥公年二十九

是歲七月公同產妹之夫張龜正死於襄城謁告視之九月夫人楊氏卒

景祐三年丙子公年三十

是歲天章閣待制權知開封府范仲淹言事忤宰相落職知饒州公切責司諫高若訥若訥以其書聞五月戊戌降爲峽州夷陵縣令公自京師沿汴絕淮沂江奉母夫人赴貶所十月至夷陵

景祐四年丁丑公年三十一

三月謁告至許昌娶薛簡肅公奎女是夏叔父都官卒九月還夷陵十二月壬辰移光化軍乾德縣令

寶元元年戊寅十一月改元

三月赴乾德是歲胥夫人所生子天

寶元二年己卯公年三十三

二月知制誥謝希深絳出守鄧州梅聖俞將宰襄城與希深偕行五月公謁告往會留旬日而還六月甲申復舊官權武成軍節度判官廳公事公自乾德奉母夫人特次於南陽冬暫如襄城

康定元年庚辰二月改元公年三十四

是春赴滑州時范文正公起爲陝西經略招討安撫使辟公掌書記辭不就六月辛亥召還復充館閣校勘仍修崇文總目十月轉太子中允癸巳同修禮書是歲子發生

慶曆元年辛巳公年三十五

五月庚戌權同知太常禮院以見修崇文總目辭許之八月乙酉許州對公事回依舊供職十一月丙寅祀南郊攝太常博士引終獻十二月加騎都尉己丑崇文總目成改集賢校理

慶曆二年壬午公年三十六

正月丁巳考試別頭舉人三月丙辰御試進士應天以實不以文賦公擬進一首賜勅書焚論四月丙子復差同知禮院契丹遣汎使求關南地宰相呂夷簡薦富弼報聘人皆危之公上書引顏真卿使李希烈事乞留弼不報五月復應詔上書極陳弊事八月請外九月通判滑州十月至

慶曆三年癸未公年三十七

是歲仁宗廣言路修政事人多薦公宜爲臺諫三月召還癸巳轉太常丞知諫院四月至京九月戊辰賜緋衣銀魚己巳同詳定國朝勳臣各次丙戌同修三朝典故十月戊申擢同修起居注十二月己亥召試知制誥公辭辛丑有旨不試直以右正言知制誥仍供諫職丁未同詳定編勅是月立春祭西太一宮爲獻官尋例賜紫章服

慶曆四年甲申公年三十八

三月庚午兼判登聞檢院四月乙未押伴契丹賀生辰人使御筵

於都亭驛己亥命公使河東計度廢麟州及盜鑄鐵錢并籌課虧額利害七月還京師八月甲午保州軍叛契丹聲言討西夏癸卯除公龍圖閣直學士河北都轉運按察使九月三朝典故成書以公書預編纂賜詔獎諭十一月南郊恩進階朝散大夫封信都縣開國子食邑五百戶

慶曆五年乙酉公年三十九

是春真定帥田况移秦州公權府事者三月時二府杜正獻范文正韓忠獻富文忠公以黨論相繼去公上書辨之小人素已憾公會公孤甥張氏犯法諫官錢明逸因以財產事及公下開封鞠治府尹楊日嚴觀望傳會上命戶部判官蘇安世入內供奉官王昭明監勘得無他八月甲戌猶落龍圖閣直學士罷都轉運按察使降知制誥知滁州十月甲戌至郡是歲子奕生

慶曆六年丙戌公年四十

公在滁自號醉翁

慶曆七年丁亥公年四十一

十二月以南郊恩加上騎都尉進封開國伯加食邑三百戶是歲子奕生

慶曆八年戊子公年四十二

閏正月乙卯轉起居舍人依舊知制誥徙知揚州二月庚寅至郡皇祐元年己丑公年四十三

正月丙午移知穎州二月丙子至郡樂西湖之勝將卜居焉四月

丙戌轉禮部郎中八月辛未復龍圖閣直學士是歲子辯生

皇祐二年庚寅公年四十四

七月丙戌改知應天府兼南京留守司事己酉至府十月己未明堂覃恩轉吏部郎中加輕車都尉是歲約梅聖俞買田於穎

皇祐三年辛卯公年四十五

皇祐四年壬辰公年四十六

三月壬戌丁母夫人憂歸穎州四月起復舊官公固辭八月許之皇祐五年癸巳公年四十七

八月自穎州護母喪歸葬吉州之瀧岡厓楊二夫人附焉是冬復至穎

至和元年甲午三月改元公年四十八

五月服闋除舊官職赴闕六月癸巳朝京師乞郡不許七月甲戌權判流內銓會小人詐爲公奏請汰內侍其徒怨怒以胡宗堯不當改官事中公戊子出知同州判吏部南曹吳充爲公辨明不報知諫院范鎮一再極言而參知政事劉沆方提舉修唐書亦乞留公修書八月丙午沆拜相戊申詔公修唐書九月辛酉遷翰林學士壬戌兼史館修撰又差勾當三班院十月乙巳朝饗景靈宮天興殿攝侍中捧盤取水十二月庚戌臘饗孝惠孝章淑德章懷皇后廟攝太尉行事

至和二年乙未公年四十九

三月同孫抃考試諸司寺監人吏六月己丑上書論宰相陳執中己而乞外改翰林侍讀學士集賢殿修撰出知蔡州侍御史趙抃知制誥劉敞上疏留公七月戊午復領舊職八月辛丑假右諫議大夫充賀契丹國母生辰使將持送仁宗御容會虜主殂癸丑改充賀登位國信使十二月庚戌宿虜界松山

嘉祐元年丙申九月改元公年五十

二月甲辰使還進北使語錄閏三月丁亥判太常寺兼禮儀事孟夏薦饗攝太尉行事五月癸未知通進銀臺司兼門下封駁事乙未免勾當三班院六月甲子奉勅祈晴醴泉觀八月壬戌知益州張方平除三司使甲子詔公權發遣三司公事以俟其至而命李淑代知銀臺司乙亥車駕詣景靈宮朝拜天興殿充贊導禮儀使

又朝謁真宗及章懿太后神御殿攝太常卿九月辛卯大慶殿行恭謝禮爲贊引太常卿禮成加上輕車都尉進封樂安郡開國侯加食邑五百戶十二月被差押伴契丹賀正旦人使御筵於都亭驛

嘉祐二年丁酉公年五十一

正月癸未權知禮部貢舉賜御書文儒二字乙己磨勘轉右諫議大夫三月癸卯爲秋青發哀苑中攝太常卿六月丙寅福康公主進封交國公主七月壬午命公攝禮部侍郎以印授冊使乙未兼判尚書禮部九月己卯兼判秘閣秘書省十一月辛巳權判史館丙申權知審刑院候朝宿回依舊辛丑免十二月辛亥權判三班院癸亥權奉安明德元德章穆三后御容於啓聖院車駕行酌獻禮充禮儀使是月被差押伴契丹賀正旦人使御筵于都亭驛

嘉祐三年戊戌公年五十二

正月壬午上幸興國寺及啓聖院朝謁太祖太宗神御殿攝太常卿二月癸卯契丹遣使告其國母哀差公館伴三月辛未兼侍讀學士以員多固辭不拜癸未充宗正寺同修玉牒官甲午同陳旭考試在京百司等人六月庚戌加龍圖閣學士權知開封府

嘉祐四年己亥公年五十三

二月戊辰免開封轉給事中同提舉在京諸司庫務是月充御試進士詳定官賜御書經二字四月丁卯奏告今冬太廟親行裕饗之禮癸酉孟夏薦饗並攝太尉行事丙子兼充羣牧使六月甲申刪定景祐廣樂記九月丁酉奉勅祈晴相國寺十月壬申車駕朝饗景靈宮癸酉裕饗太廟並攝侍中行事丁丑加護軍食實封三百戶

嘉祐五年庚子公年五十四

四月丁卯孟夏薦饗太廟攝太尉行事七月戊戌上新修唐書二

百五十卷庚子推賞轉禮部侍郎九月丁亥兼翰林侍讀學士十月庚午下元節車駕朝拜景靈宮天興殿朝謁真宗及章懿太后神御殿攝侍中十一月辛丑拜樞密副使加食邑五百戶食實封二百戶甲寅同修樞密院時政記十二月被差押伴契丹賀正旦人使御筵於都亭驛

嘉祐六年辛丑公年五十五

三月戊申侍上幸後苑賞花華景亭釣魚涵曦亭遂宴太清樓閏八月辛丑轉戶部侍郎參知政事進封開國公加食邑五百戶食實封二百戶公辭轉官許之九月庚申同修中書時政記十二月丙戌臘享太廟攝太尉行事

嘉祐七年壬寅公年五十六

正月己酉朔太慶殿朝賀攝侍中承旨宣制三月乙卯祈雨南郊攝太尉行事辛酉提舉三館秘閣寫校書籍同譯經閣文四月壬午上嘉祐編勅七月庚戌差充明堂國簿使九月壬申文德殿奏請致齋攝侍中奏中嚴外辦己酉朝饗景靈宮庚戌朝饗太廟並攝司徒辛亥大饗明堂己未進階正奉大夫加柱國仍賜推忠佐理功臣十二月丙申上幸龍圖天章閣召輔臣至待制三司副使以上臺諫官皇子宗室駙馬都尉管軍觀三聖御書又幸寶文閣親飛白書分賜羣臣公得雙幅大書歲字下有御押加以御寶王珪夾題八字云嘉祐御札賜歐陽修仍於絹尾書翰林學士臣王珪奉聖旨題賜名又出御製觀書詩一首令羣臣屬和遂宴羣玉殿庚子再召近臣及三館臣僚赴天章閣觀三朝瑞物太宗真宗御集次赴寶文閣觀御飛白書賜公金花綵字復燕羣玉殿後數日公以狀進詩謝

按兩宴皆有賜書而實錄及范蜀公東齋記事止載丙申有賜當時王政公親奉詔爲序亦不及庚子再賜而實錄及序又不

及館職預召惟東齋記事言之公記陸子履家藏飛白字明言羣玉殿所賜時子履任集賢校理與東齋記事合但不知是日公得何字其爲金花牋則無疑然陳無已六一堂圖書詩乃云黃絹兩大字又何也韓忠獻公謝詩云鸞拂宮綳舞胡文恭公亦有謝御飛白扇子詩得非預坐者衆所賜或不同耶實錄二十三丙申二十七日庚子而政公序乃作戊申壬子不應差誤如此殆傳寫訛耳

是月差押伴契丹賀正旦人使御筵於都亭驛

嘉祐八年癸卯公年五十七

二月乙亥奉勅充沈貴妃冊禮使不及行禮四月壬申英宗卽位甲戌奉勅書大行皇帝哀冊證寶甲申單恩轉戶部侍郎進階金紫光祿大夫加食邑五百戶食實封二百戶仍賜推忠協謀佐理功臣乙酉奉勅篆受命寶其文曰皇帝恭膺天命之寶五月戊辰爲皇帝祈福於南郊攝太尉行事七月戊申押伴契丹祭吊人使御筵於都亭驛八月癸巳奉勅篆大行皇帝證寶其文曰神文聖武明孝皇帝之寶十月乙酉增修太廟成命告七室十二月庚午伴押契丹賀正旦人使御筵於都亭驛

英宗治平元年甲辰公年五十八

四月甲午奉勅祈雨社稷閏五月戊辰特轉吏部侍郎八月辛丑奉勅祈晴太社十二月壬子差押伴契丹賀正旦人使御筵於都亭驛

治平二年乙巳公年五十九

是春上表乞外不允四月辛丑景靈宮奉安仁宗御容車駕行酌獻之禮攝侍中八月以大雨水再乞避位不允九月辛酉提舉編纂太常禮書百卷成詔召太常因草禮賜銀絹十一月庚午車駕朝饗景靈宮辛未饗太廟壬申祀南郊攝司空行事進階光祿大

夫加上柱國食邑五百戶

治平三年丙午公年六十

三月三日賜上巳宴時初頒明天曆適值丁巳是月以言者指濮議爲邪說力求去不允七月癸酉薦舉太廟攝太尉行事十二月癸未奉勅篆皇帝尊號寶其文曰體乾膺曆文武廣孝皇帝之寶乙巳押伴契丹賀正旦人使御筵於都亭驛

治平四年丁未公年六十一

正月丁巳神宗卽位戊辰單恩轉尚書左丞進階特進加食邑五百戶食實封二百戶仍賜推忠協謀同德佐理功臣二月第三子葉登進士第是月御史彭思永將之奇以飛語汙公上察其誣斥之公力求去三月壬申除觀文殿學士轉刑部尚書知亳州改賜推誠保德崇仁翊戴功臣閏三月辛巳宣發書駐泊公事陸辭乞便道過賴少留許之五月甲辰至亳六月戊申視事

神宗熙寧元年戊申公年六十二

是歲連上表乞致仕不允八月乙巳轉兵部尚書改知青州充京東東路安撫使九月丙申至青十一月丁亥郊祀恩加食邑五百戶食實封二百戶是歲築第於穎

熙寧二年己酉公年六十三

三月丙午王延慶便道傳宣撫問仍賜香藥一銀合又遞賜新校定前漢書以公嘗預刊定也冬乞壽州便私記不允

熙寧三年庚戌公年六十四

四月壬申除檢校太保宣徽南院使判太原府河東路經略安撫監牧使兼并代澤路麟府嵐石路兵馬都總管公堅辭不受七月辛卯改知蔡州九月甲寅至蔡是歲更號六一居士

熙寧四年辛亥公年六十五

公在蔡累章告老六月甲子以觀文殿學士太子少師致仕七月

歸穎八月將祀明堂詔赴闕陪位公上章乞免從之禮成賜衣帶  
器幣牲饌

熙寧五年壬子公年六十六

閏七月庚午公薨八月丁亥贈太子太師

熙寧七年八月諡文忠謚議見附錄

熙寧八年九月乙酉葬開封府新鄭縣旌賢鄉

元豐三年十二月以子升朝遇太禮贈太尉

元豐八年十一月贈太師追封康國公

紹聖三年五月追封充國公

崇寧三年追封秦國公政和三年追封楚國公皆以子棐遇郊恩

宋文忠公小影



像讚

門人蘇軾題

賢哉文忠直道大節知進知退既明且哲陸贄議論韓愈文章李杜  
歌詩公無不長當世大儒邦家之光

又

宋李端叔題

霜空無雲秋天澄霧昭然政通何勞鍾靈儼然望之希世一遇萬邦  
方春逢坡益注

又

宋晁悅之題

惟我昭陵公乃得升天下無朋國有魏公公乃得容不朋以忠風波  
既散高山獨見小人是嘆昔賢在是寧論厥似聞其百世

又

清劉從孫玄百拜謹撰主書

文在兩間與世推移道之將興文必先知八代萎靡韓歐繼作讀者  
瞻之莫啓濂洛五季鉅筆素王微權本論拳拳慶曆七篇人心既正  
士習斯淳黃河泰華我公其人



累代校刊姓名

宋元祐六年男發 英

榮 辯

同集

門人蘇軾

僧弟蘇轍

編次

紹興五年郡人孫謙益 桂陽軍教授丁朝佐 鄉進士曾三異

登仕郎 胡柯

慶元二年州縣學職葛 據 王伯芻 朱岑 胡柄

清江主簿曾 渙 鄉進士胡 渙 鄉進士劉 璧

郡人羅 泌

明天順辛巳郡太守程諱宗

教授 鄭 鋼

弘治辛亥郡 太守

顧諱福

江南姑蘇人

正德壬申郡 太守

劉諱喬

直隸慈谿人

嘉靖丙申郡 司馬

李諱本

浙江會稽人

嘉靖乙卯行人司行人

陳諱珊

逸士羅 良

左布政汪諱宗元

潘諱恩

馬諱森

左 參 政

傅諱頤

湖北沔陽人

右 參 議

王諱喬齡

張諱思誠

江西撫都院陳上虞人

巡按御史吳海寧人

南昌郡守陸諱九成

司馬黃諱持衡

別駕汪諱佐

司理王諱元春

臨 江 司 馬

顧諱育

浙江仁和人

南新二縣宰

張諱于達

杜諱完

嘉靖庚申江西撫都院

何諱遷

湖北安陸人

萬曆元年郡 太守

雷諱以仁

湖北夷陵人

萬曆己卯首定八大家古文

茅諱坤

浙江歸安人

國朝康熙壬子合刊歐文二集

曾諱弘

本郡吉水人

又累刊八大家文 孫諱琮

呂諱葆中

汪諱份

乾隆丙寅

廬陵嗣孫鈞溪副貢生教諭

安世

太學生龔相 凌 坦

分居水陂岸

邑庠生煌 鎔 謙益

分居富溪鎮

東澤明 白沂庠生淮

寧溪國學章

安福湛塘庠生夔

字江庠生枚

桂里孝廉知縣質

蜀江孝廉知縣彥

龍南孝廉知縣龍

泰山任廣豐諭徽柔

貴州脩文縣瑤

龍泉後巷恩貢教諭恭

太學生法詢

宜黃陽坊孝廉知縣易

邑庠生逢韶

桂 瀏陽國學啓遠